



Broj: 06-05-4176-3/17
Sarajevo, 14.06.2017.g.

Na osnovu Programa mjera za poticaj zapošljavanja boračke populacije u Kantonu Sarajevo za 2017/2018. godinu, prihvaćenog Zaključkom Vlade Kantona Sarajevo broj:02-05-20150-14/17 od 08.06.2017.godine Ministarstvo za boračka pitanja Kantona Sarajevo, o b j a v l j u j e

JAVNI POZIV

za realizaciju mjere podrške pojedincima-zadrukarima ili zadrugama koje okupljaju boračku populaciju putem sufinansiranja poslovnih projekata od strane Ministarstva za boračka pitanja, koji će za rezultat imati novo upošljavanje boračke populacije

I - PREDMET JAVNOG POZIVA

Programom realizacije poticajnih mjera zapošljavanja pripadnika boračke populacije Ministarstva za boračka pitanja Kantona Sarajevo za 2017/2018. godinu broj:06-05-4176-2/17 od 22.05.2017.godine planirano je davanje poticaja boračkoj populaciji za podršku pojedincima-zadrukarima ili zadrugama koje okupljaju boračku populaciju putem sufinansiranja poslovnih projekata od strane Ministarstva za boračka pitanja kojim se ostvaruje novo upošljavanje boračke populacije.

U okviru navedenog Programa usvojena je i mjera podrške pojedincima-zadrukarima ili zadrugama koje okupljaju boračku populaciju putem sufinansiranja poslovnih projekata od strane Ministarstva za boračka pitanja, koji će za rezultat imati novo upošljavanje boračke populacije. Ova mjera omogućuje pravo sudjelovanja u raspodjeli sredstava koju mogu ostvariti pojedinci-zadrukarima ili zadruge koji okupljaju boračku/braniteljsku populaciju i registrirane su kao boračke zadruge u Kantonu Sarajevo za obavljanje djelatnosti (proizvodne, uslužne, turističke, zanatske, grafičke, IT tehnologija i sl.) koji se odnose na zapošljavanje boračke populacije, sa razrađenim projektima usmjerenim na realizaciju ciljeva samozapošljavanja/zapošljavanja.

Opći cilj Programa je resocijalizacija boračke populacije putem njihove integracije na tržište rada, odnosno povećanje mogućnosti za njihovo zapošljavanje, kako bi se i uz druge programe ove vrste i aktivne mjere zapošljavanja u Kantonu Sarajevo moglo utjecati na stvaranje uvjeta za zapošljavanje ovih ranjivih kategorija.

Poseban cilj Programa je poboljšati pristup tržištu rada i stvoriti minimalne uvjete za zapošljavanje i samozapošljavanje boračke populacije, čime bi se povećala konkurentnost ovih lica na tržištu rada. Razvijanje svijesti o potrebi udruživanja u zadruge, kao jedan od načina da se ostvari cilj zapošljavanja kompletnih porodica iz ove populacije i izbor deficitarnih, na tržištu traženih i aktuelnih djelatnosti što će dovesti do povećanja konkurentnosti ove populacije kako na tržištu rada, tako i na tržištu uopće.

Predmet ovog Javnog poziva je provođenje mjera samozapošljavanja/zapošljavanja pripadnika boračke populacije (uključujući i članove obitelji), tj. odobravanje sredstava za sufinansiranje poslovnih projekata pojedinaca-zadugara ili boračkih zadruga.

Sredstva planirana u Budžetu Kantona Sarajevo za ove namjene iznose 100.000,00 KM.

II - PRAVO UČEŠĆA

Pravo učešća imaju:

- a) pojedinci – zadrugari putem zadruga,
- b) boračke zadruge i zadruge koje u svom sastavu okupljaju najmanje 70% zadrugara iz boračke populacije.
- c) zainteresirani subjekti/pojedinci za podršku u osnivanju boračkih zadruga, koji će se u određenom iznosu podržati, odnosno refundirati troškovi novoosnovanih zadruga do visine osnivačkog uloga i neophodnih administrativnih troškova registracije.

Pravo učešća u ovoj mjeri nemaju pojedinci – zadrugari poljoprivrednici iz razloga što su mjere iz prošlogodišnjeg programa koji je realiziran u cijelosti, obuhvatale samo primarnu poljoprivrednu proizvodnju (sadnice maline i plastenici), kao potpore male vrijednosti (de minimis potpore).

III – NAČIN ODOBRAVANJA SREDSTAVA I OPĆI I POSEBNI KRITERIJI

Odobrovanje sredstava iz tačke I ovog poziva vršiti će se u skladu sa općim i posebnim kriterijima.

Opći kriterij za odobrenje sredstava za sufinansiranje pojedinaca-zadugara ili boračkih zadruga su:

- a) pripadnost boračkoj/braniteljskoj populaciji,
- b) podnositelj aplikacije je pojedinac-zadugar koja mora imati prijavljeno prebivalište-boravište na Kantonu Sarajevo, a najkasnije do 06.02.1999.godine i dalje neprekidno,
- c) da je boračka zadruge registrirana u Kantonu Sarajevo;
- d) da nije korišten poticaj kod prethodnog zapošljavanja.

Posebni kriteriji za odobravanje sredstava za sufinansiranje poslovnih planova pojedinaca-zadugara ili zadruga su:

- 1) Vrsta djelatnosti:
 - a) Proizvodna i turistička djelatnost.....30 bodova
 - b) Intelektualna i uslužna djelatnost.....20 bodova
 - c) Ostalo.....10 bodova
- 2) Trenutni broj zaposlenih radnika:
 - a) 1 – 3.....10 bodova
 - b) 4 – 7.....15 bodova
 - c) 8 i više.....20 bodova
- 3) Broj novoupisanih radnika po poslovnom planu:
 - a) 1 – 310 bodova
 - b) 4 – 7.....15 bodova
 - c) 8 i više.....20 bodova
- 4) Ocjena poslovne ideje:
 - a) Zadovoljava.....10 bodova
 - b) Dobra.....15 bodova
 - c) Odlična.....20 bodova
- 5) Ocjena poslovnog plana:
 - a) Zadovoljava.....10 bodova
 - b) Dobra.....15 bodova
 - c) Odlična.....20 bodova

- 6) Vlastito učešće:
 - a) do 5.000,00 KM.....10 bodova
 - b) od 5.000,00 KM do 10.000,00 KM.....20 bodova
 - c) preko 10.000,00 KM.....30 bodova
- 7) Visina traženih sredstava po jednoj osobi za zapošljavanje ili samozapošljavanje:
 - a) do 5.000,00 KM.....20 bodova
 - b) od 5.000,00 KM do 7.000,00 KM.....15 bodova
 - c) preko 7.000,00 KM.....10 bodova

Opći kriteriji su eliminatorni, dok će se po posebnim vrijednovati zaprimljene aplikacije koje ispunjavaju opće kriterije, te na osnovu osvojenih bodova sačiniti će se rang lista.

U slučaju da nakon vrijednovanja aplikacija, dva ili više aplikanata imaju jednak broj bodova, prednost ima aplikant sa većim brojem zaposlenih, a ako imaju jednak broj zaposlenih onda prednost ima aplikant iz proizvodne i turističke djelatnosti, odnosno ako dva ili više aplikanata i dalje imaju isti broj bodova, prednost se daje aplikantu koji je prije podnio aplikaciju za učešće u ovoj mjeri.

Najveći iznos koji može biti odobren pojedincu-zadrukaru ili zadruzi je 10.000 KM po jednoj novouposlenoj osobi ili pojedincu-zadrukaru koji pokreće samostalnu djelatnost, odnosno 3.500 KM za osnivanje zadruge.

Vrijednovanje aplikacija se vrši na osnovu priložene dokumentacije, u skladu sa naprijed navedenim kriterijima. Vrijednovanje vrši Stručni tim pri Ministarstvu, koji sačinjava i prijedlog liste aplikanata za učešće u mjeri. Konačnu listu aplikanata utvrđuje Ministar nakon čega se pristupa zaključenju ugovora sa aplikantima čije su aplikacije za učešće u ovoj mjeri prihvaćene.

Ugovorom se uređuju međusobna prava i obaveze Ministarstva i aplikanata, obavezu aplikanta za zaključenje ugovora o radu sa nezaposlenom osobom sa punim radnim vremenom na period od najmanje 12 mjeseci, držanje registrovane djelatnosti najmanje 12 mjeseci, obavezu isplate naknada i pripadajućih poreza i doprinosa za zaposlenu osobu, zadržavanje u radnom odnosu isti broj zaposlenika koji je zatečen u periodu podnošenja zahtjeva, uvećan za broj sufinansiranih osoba, obavezu pravdanja pomenutih troškova i dr.

Pojedinci ili zadruge su dužni sredstva odobrena od ovog Ministarstva utrošiti u skladu sa projektom, s tim da se ne može utrošiti više od 25% od odobrenih novčanih sredstava za materijalne i administrativne troškove.

IV- DOKUMENTACIJA

Svi subjekti prilikom apliciranja na Javni poziv dužni su dostaviti slijedeću osnovnu dokumentaciju:

- a) Adekvatno popunjen i ovjeren propisani aplikacioni formular;
- b) Rješenje o registraciji (izuzev za one koji traže podršku za osnivanje) i potvrda banke o otvaranju transakcijskog – tekućeg računa;
- c) Projekat za koji se traži sufinansiranje sa slijedećim elementima;
 - 1) poslovni plan sa očekivanim prihodima i rashodima, te visinom vlastitog učešća;
 - 2) druge činjenice i dokazi koje govore u prilog opravdanosti projekta, njegovom kapacitetu za zapošljavanje boračke populacije (dokaz o vlasništvu, ovjerena kopija ugovora o zakupu ili korištenju, kao i drugog resursa sa kojim aplikant raspolaže);
- d) Izjava o visini odobrenih (dobijenih) finansijskih sredstava za ove namjene, od bilo kojeg nivoa vlasti u proteklom (prethodnom) periodu, ovjerena od nadležnog općinskog organa;
- e) Dokaz o zadrugarskom statusu (spisak zadrugara registrovanih u knjigu zadrugara ovjeren od strane nadležnog organa);

- f) Uvjerenje o pripadnosti boračkoj populaciji za aplikante, kao i za članove njihovih užih porodica, ukoliko su sastavni dio projekta
g) i druga dokumentacija na zahtjev Stručnog tima.

V - PROCES ODABIRA I OBJAVA LISTE

Proces odabira će vršiti Stručni tim, a Ministar donosi konačnu odluku o dodjeli sredstava po Javnom pozivu.

Svi podnositelji će se bodovati i rangirati, a rang lista će biti objavljena na info-punktu Ministarstva za boračka pitanja Kantona Sarajevo (šalter sala Kantona Sarajevo) telefon: 033/562-273 i web stranici Ministarstva www.mbp.ks.gov.ba

Nezadovoljni kandidati mogu istaći svoj prigovor Ministru u roku od 8 dana od dana objave liste, a prigovor mora biti obrazložen i utemeljen na dokazima.

Ministarstvo na osnovu konačne odluke zaključuju ugovore sa krajnjim korisnicima.

VI – NADZOR, KONTROLA I IZVJEŠTAVANJE

Odobrena sredstva za pomoć u zapošljavanju pojedinaca-zadrugara ili zadruga iz Budžeta Ministarstva moraju se iskoristiti za odobrene namjene, prema odredbama ugovora koji će ministarstvo sklopiti sa korisnicima sredstava.

Prije konačnog potpisivanja ugovora sa korisnikom sredstava, a na osnovu procjene Stručnog tima uz mišljenje experta iz Zadružnog saveza Federacije BiH, Ministarstvo može tražiti izmjenu i dopunu Proizvodnog programa ili Poslovnog plana, kako bi procjenjeni troškovi odgovarali realnim troškovima u odnosu na predložene aktivnosti.

Svaki korisnik sredstava odobrenih po ovom Javnom pozivu, obavezan je nakon realizacije odobrenih projekata, a po potrebi i na zahtjev Ministarstva, dostaviti detaljan izvještaj o utrošku odobrenih sredstava sa finansijskog aspekta zajedno sa kompletnom dokumentacijom, što će se detaljnije propisati odredbama pojedinačno sklopljenim ugovorima sa korisnikom sredstava.

Za izvršenje ugovora aplikanti su obavezni obezbijediti безусловnu bankovnu garanciju na odobreni iznos sredstava ili bjanko mjenicu, a sredstva za osnivanje zadruga doznačavat će se na bazi refundacija kada aplikanti dostave dokaze o osnivanju zadruga.

Aplikanti koji budu korisnici ove mjere zapošljavanja dužni su u radnom odnosu zadržati postojeći broj radnika koji su imali u momentu podnošenja zahtjeva, uvećan za broj sufinansiranih osoba, osim u slučajevima odlazaka u penziju postojećih radnika.

VII- OSTALE INFORMACIJE

Lica (fizička ili pravna) koja su već ostvarila pravo na novčanu pomoć po istom ili sličnom osnovu od drugih institucija, a ne radi se o nastavku realizacije projekata, neće se uzimati u razmatranje.

Zahtjevi se dostavljaju u roku od 21 dana od dana objavljivanja ovog poziva, a mogu se po potrebi zaprimati i sve do isteka za ove namjene planiranih sredstava.

Zahtjevi koji nisu kompletirani sa traženim dokumentima iz tačke IV ovog poziva, mogu se dopuniti i kompletirati u razumnom roku, a do tada se neće uzimati u razmatranje.

NAPOMENA:

- Obavezno predavati fotokopije dokumenata koje moraju biti ovjerene ili original dokumenta.
- Predata dokumentacija svih aplikacija neće se vraćati podnosiocima zahtjeva.

VIII-MJESTO PODNOŠENJA ZAHTJEVA

Za priznavanje i ostvarivanje navedenih oblika prava, zahtjevi na posebno propisanom obrascu za svaki oblik ostvarivanja prava (šalter sala Kantona Sarajevo) sa potrebnom dokumentacijom podnose se na slijedeću adresu: Ministarstvo za boračka pitanja Kantona Sarajevo, ulica Reisa Dž. Čauševića br.1, 71000 Sarajevo putem pošte ili ličnim podnošenjem u šalter sali Kantona Sarajevo.

Informacije vezano za predmet Javnog poziva, mogu se dobiti na info-punktu Ministarstva za boračka pitanja Kantona Sarajevo (šalter sala Kantona Sarajevo) telefon: dir. 033/562-273 ili Centrala 033/562-000 lokal 2273.

Tekst Javnog poziva, rang lista i propisani aplikacioni formulari biće dostupni na Web stranici Ministarstva www.mbp.ks.gov.ba



web: <http://mbp.ks.gov.ba>
 e-mail: mbp@mbp.ks.gov.ba
 Tel: + 387 (0) 33 562-012, Fax: + 387 (0) 33 562-251
 Sarajevo, Reisa Džemaludina Čauševića 1

